



Sabtu, 27 April 2024
Ogen: Perbahanen rasul 2:1-4



Dem Alu Kesah si Badia



Kerna wari Pentakosta, icatat i bas kitab Perbahanen Rasul-rasul 2:1-4. Wari e nuriken kerna nusurna Kesah si Badia nandangi murid Jesus, sue ras padanNa. Wari e rembang jadi i bas wari pentakosta e me 50 wari kenca Paskah kalak Jahudi. I bas wari e, kerina ajar-ajar ringan i bas sada rumah. Rempet reh sora megang i langit nari ras ndemi rumah ingan kalak ndai. E maka dilah-dilah api cinep i bas ajar-ajar e, jenari dem ia kerina alu kesah si Badia. Jenari nggo beluh ia kerina erbahasa si deban.

Enda me kejadi si menaken gereja sipemena, I ja Kesah si Badia mereken gegeh ras ngaruh si mbelin i bas ajar-ajar guna meritaken berita Injil kerna Jesus Kristus man kerina jelma si pelain-lain bahasa. Dilah-dilah api si jadi lambang Kesah Si Badia erkuasa i bas diri ajar-ajar, ngasup ia kerina erbelas alu erbage bahasa. Si e nuduhkan maka pesan Berita e itujuken labo man sada bangsa ngenca tapi man kerina bangsa-bangsa umat manusia. Enda me paksa si penting i bas sejarah Kristen guna nuduhkan penggenapen janji Tuhan kerna rehna pembela ras si nampati e me Kesah si Badia e jine.

I bas wari Pentakosta sekali enda pe kita ibabai gelah geluhta idemi kesah Si Badia. Tandana dem alu Kesah e, lit semangatta nuriken kerna kiniulin Tuhan man banta. Sipakeken telentata lanai mbiar dingin mela-mela i bas ngelai Dibata. Jenari teridah kekelengenta la terjeng man kalak si cocok siakap tapi pe man kalak sideban. Sabap bage me ate Tuhan gelah kita banci jadi pasu-pasu man jelma si enterem. Erguna ras erkarya i bas Tuhan.

